

嚴東有詩集

嚴東有詩集總目

歸求草堂詩集六卷

秋山紀行集二卷

金闕攀松集一卷

玉井舉蓮集一卷

嚴東有詩集序

嚴東有先生歸求草堂詩集六卷秋山紀行集二卷金闕  
攀松集一卷玉井攀蓮集一卷都十卷余彙而刻之序曰  
聖清文治遠軼漢唐而尤以康乾兩朝爲極盛大江以南  
爲文化所先被

聖祖

高宗屢次巡幸士之歌頌太平獻詩賦者以億萬計  
行在拔其尤而

召試之高者

特旨授官與舉人次亦拜文綺之

賜故其時人文彪蔚如景星卿雲麒麟鳳皇時見於堯舜

之朝舉無足異先生生長江南文物之會少負雋才又讀書揚州馬氏瓊瓏山館中因而獲交當世宏儒碩彥於是發爲文章益得朋友圖史之助今茲所傳雖非全豹而卓然兼袁蔣孫洪兩派之長是亦可知其所蘊蓄已夫論詩區唐宋說詩尊李杜此今日爲人序詩者之通詞不知一朝有一朝之風氣一時有一時之景物漢魏詩止言夫婦朋友晉宋以來始有山水至唐人而有寺觀宋元以後名物之繁日出天地之局日新今之自限於六朝與各守一家數者蓋亦不可與言詩久矣先生詩自

召試至官內閣其境前後不同詩亦隨時而變秋山紀行寫塞外光景至今讀之朔風秋草如在目前其遊嵩岱二

嶽之作則鑱刻造化驅策山靈尤爲有山水以來未見之  
奇作觀畢袁二公序亦旣傾倒至矣予何庸贊一詞乎始  
余獲歸求草堂詩集六卷秋山紀行集二卷均爲原稿未  
經前人刊行繼得金闕攀松玉井拳蓮二集於近時上元  
傅春官所刻金陵叢刻中合成斯集俾嗜先生詩者快觀  
其全焉先生詩當時爲畢袁二公所推服洪亮吉北江詩  
話評先生詩如觸目琳琅率非己有北江與畢袁論詩異  
指故持論不同或先生全集未經刪定不如此數卷之精  
詣亦未可知獨慨先生同時從畢公關中幕者如孫淵如  
星衍洪北江亮吉黃仲則景仁程魚門晉芳諸人詩文集  
至今海內風行爲人傳誦獨先生詩若存若泯遲之百年

之久待余始校錄而存之是若有數定者然亦可詫也嗟  
乎國朝詩人予嘗窺見一二佳句而不獲其全者如丁飛  
濤澎白燕樓集吾家橫山先生已畦集皆生時赫赫有名  
於壇坫而今無一卷之傳然則先生斯集之留遺斯固事  
有大幸者矣宣統三年辛亥七月朔長沙葉德輝序

嚴道甫詩序

余壬午舉於鄉江寧嚴道甫亦於是歲應 召試賜舉人授中書與余爲同年友因得讀其詩知道甫之於詩也深矣歲丙戌試禮部同號舍縱談至夜分道甫曰詩莫盛於三唐盛唐尙矣若滄州嘉州摩詰東川詩之能品也杜少陵則神品也至矣乎然而得其門戶專意求之無慮自成家顧吾輩所謂立言不朽者不第在此耳時又竊意道甫之未肯專工於詩也後余成進士授內閣中書於道甫爲同官後輩見道甫之勤於職寅入申出日以爲常時委審巨案襍被宿禁中或經旬不返舍又竊意道甫之無暇爲詩也今道甫逝矣令子子進來自江寧出其全集讀之

而後知道甫之詩卓然必傳於後無疑焉今之言詩者夥矣或好摹古之作若土偶生氣不存焉或取齒牙之利類俳優古法盡淪焉或標新領異失之巧或怒目張拳失之霸於是乎其言詩果有當於古人之詩否耶今觀道甫之作氣恬而法密神清而韻和其才大不矜才其氣盛不使氣讀其詩如見其人殆一代之正聲乎道甫在軍機受知於諸城劉文正公甚深文正公歿因疾遂不復出以遊覽著述自娛然則道甫之難進易退合於古君子之道所以見重於端人者更自有在第以詩言因未深於知道甫者歟道甫著述甚富子進才瞻學博能世其業行將次第刊其遺跡問世道甫蓋不朽矣潘奕雋序

嚴東有詩序

吾友吳君敏軒於世落落寡推許獨盛稱嚴生東有以爲才士間謂余曰始識子時年二十四吾嘗語子以爲才可及年不可及今東有亦猶是也余心識之王申春就試金陵敏軒偕東有來訪其氣凝以深叩所讀書無不有索所爲詩則謙讓不肯出獨愛余詩作爲駢體序千餘言風晨雨夕余三人往來最密也又三年余訪東有於金陵又一年會於揚州時敏軒已下世而東有名蔚起四方士爭與交顧歆然不自足思沈酣經史爲不朽業以貪多務奇爲無足恃噫東有之志卽予曩日之志也顧余學未成深有愧於敏軒之矜許今東有能堅其志而以余爲鑒不以功

名人事擾之則敏軒所期望於友朋者微東有其誰屬耶  
歲丁酉東有來遊淮陰出數年所得詩稿示余其詩淳澹  
恣肆兼有眾體固世所爭賞無待子言因述敏軒昔所以  
勗予者弁其端俾世之覽者知吾友之志固別有在蓋不  
獨籍聲韻以傳也程晉芳序

內閣侍讀嚴長明傳

錢大昕撰

嚴長明字冬友號道甫江寧人幼讀書十行並下年十一臨川李閣學紱典試江南聞其早慧欲見之因介熊編修本往謁李隨舉子夏二字令對卽應聲曰亥唐李大奇之謂方侍郎苞楊編修繩武曰此將來國器也公等善視之遂執經二人之門及補縣學生學使夢侍郎以國士目之侍郎知其貧問所需長明曰貧乃士之常聞廣陵馬氏多藏書願得一席爲讀書計耳因薦之盧運使見留立延致之是時東南名士多假館馬氏齋長明虛心質難相與上下其議論遂博極羣書乾隆二十七年天子巡幸江南長明以獻賦

召試特賜舉人授內閣中書甫任事卽奏充方略館纂修  
官以書局在內廷許懸數珠中書在書局得懸數珠自此  
始也一日戶部奏賦役全書所載雜項錢糧名目頗多請  
并入地丁項下內閣已票擬依議矣長明言於劉文正統  
勳曰雜項既經折色卽爲正供若并去其名目異日如薪  
紅茶藥之類更有需用必復加徵是重困民也劉公曰不  
圖後生有此讜論卽令駁止之因薦入軍機處行走傅文  
忠公恆亦器重之樞廷有重難事輒委決焉嘗扈

蹕木蘭大雪中失橐駝并所裝物求之不獲越一日一人  
牽駝而至且謝罪問之乃故軍機蘇拉緣事遣配者問何  
以知爲吾物曰軍機官披羊裘者獨公一人今篋無他裘

非公而誰問既竊何以復還曰恐公寒耳勞以錢而遣之上嘗問軍機章京中人才可用者傅公對曰人才可用者多若有守有爲可繼胡寶琮者嚴長明一人耳長明內直日久諳悉典故尤務持平允雲南糧儲道羅源浩虧銅廠銀萬一千兩又分賠屬員汪大鏞銀一千兩有

旨加罰十倍以一年爲限逾限卽正法羅已納正項十有一萬矣仍有分賠六萬未完而限垂滿呈乞展限

詔下軍機大臣與刑部查辦時劉文正公掌刑部方主會試入闈諸公相視莫能決適有

行在宣諭軍機大臣事長明既詣貢院搥鼓求見劉公宣諭畢因從容曰羅觀察之限已迫俟公出闈恐無及矣其

所欠者分賠屬吏之項昨見吏部檔汪大鏞捐復赴補直隸屬員既邀寬釋且得官而上司乃坐極刑可乎卽於袖中出請寬限稿求畫押劉公義而許之長明出以示諸公列銜會奏果奉

俞旨令汪大鏞分繳欠項而羅得出獄矣擢內閣侍讀厯充通鑑輯覽一統志熱河志纂修官長明於蒙古托忒唐古特文字一見便能通曉嘗奉

命直經兕館更正繙譯名義蒙古源流諸書書成輒進秩焉以父憂去官尋丁母憂哀毀過禮免喪後引疾不出築室三楹顏曰歸求艸堂藏書三萬卷金石文字三千卷日吟咏其中海內求詩文者踵相接從容應之無勦色嘗語

學者曰士不周覽古今載籍不徧交海內賢俊不通知當代典章遽欲握筆撰述縱使信今亦難傳後其自命如此畢中丞沅巡撫山西招至官齋爲文字交因得游太華終南之勝詩文益奇縱所得金石刻益富在秦中十載撰西安府志八十卷漢中府志四十卷皆詳贍有法晚歲爲廬江書院掌院卒年五十七生平著述有歸求艸堂詩文集西清備對毛詩地理疏證五經算術補正三經答問三史答問淮南天文太陰解文選課讀文選聲類尊聞錄獻徵餘錄知白齋金石類籤金石文字跋尾石經考異漢金石例五嶽貞珉攷五陵金石志平原石蹟表吳興石蹟表素靈發伏墨緣小錄南宋文鑑奇觚類聚八表停雲錄養生

家言懷袖集吳諧志凡二十餘種子觀晉皆以讀書世其家

論曰予友曹學士仁虎有言政事可以文飾惟文學不可假借風節或可激於一時而成惟文學非積久不能致子與侍讀交廿餘年聽其議論經緯古今混混不竭可謂閱覽博物文學之宗矣同歲

召試得官者歛程晉芳魚門上海趙文哲損之長洲吳泰來企晉上海陸錫熊健男彬彬爾雅皆述作選盛矣哉

題記

嚴冬友侍讀歸求艸堂詩集六卷始於江南

召試終於內官侍讀後從畢秋帆制軍陝西幕當必更有

續作惜此無之近人傅氏

名春官

刻金陵叢刻內有金闕攀

松集玉井簪蓮集乃先生遊嵩岱二嶽之作則在出都後  
矣余又藏有秋山紀行集二卷乃先生手書真蹟蓋木蘭  
扈

蹕時沿途所作錢大昕撰先生傳但稱其有歸求艸堂詩  
文集不云若干卷大約入陝以後有詩固未編次也先生  
詩律極細詩功至深以當時詩人比論實在黃仲則之右  
乃仲則兩當軒集雕板數次家有其書而先生詩乃無人

爲之表章刊布是固有幸有不幸也宣統二年庚戌嘉平  
望日德輝記

宣統三年辛亥孟陬錢唐吳慶坻讀竟 寫手頗劣有謬  
字爲校勘書於上方

歸求草堂

詩集

長沙粟拱題

壬子  
郎園  
小滿  
校刊

歸求草堂詩集卷一

江寧 嚴長明

辛未

童子籠鳥簷間音甚清越戲作一詩

青春不解語著物自成聲  
小鳥氣先得空廊時一鳴  
遊絲當戶歛輕綠接簷生  
我意與俱適新吟半格成

夜讀寒甚逮曉有作

長檠黯無光深爐焰蚤息  
俯聽鄰雞聲暗覩紙窗色  
手書未盡番十指凍欲直  
洋洋獨何依中厨火親覓  
折竹連古梅幽香倏已襲  
因知造化心旋轉不容隙  
嚴寒雖有時春氣暗已卽  
貧豈獨我私志迺自余  
迪乘明問寢歸旭日滿

東壁

吳丈敏軒招集文木山房分詠南史隱逸傳得雷次  
宗陶宏景各賦一首

束髮通毛詩還轅究喪禮不謂六代人所業迺如此少惜  
參元風匿跡同畏壘儒林傳自遺夷逸竟一揆而我方陸  
沈白衣慕遐軌鍾峯直叢叢曰極心亦委

陶公青雲器手香降人天道迺郭景純藝亦葛稚川朱門  
聊一憇掉首行挂冠眷茲館壇舊作誥三千言淵明賦山  
海正則驂連蜃下士滯其跡將謂求神仙

過顧氏息園和敏軒丈韻

曾見尚書第登臨跡已荒人稀苔草合水近竹風涼漁具

安橫檻書聲出壞牆可憐舊時燕猶自語空梁

壬申

二月十四日雪

時應省試

就試多逢雨今番雪倍濡青陽知未透白袷看何殊殘卷  
他時映清冷此夕孤萬間雖大庇能免冽寒無

春盡日登冶城

東風含嘯陟吳城極目遙空靜杳冥天地無情春又老江  
山如夢遠難醒暮雲何處曾留碧雙鬢前宵頓減青休訝  
子安吟思苦春秋廿二等間經

王勃春思賦咸亨二年余春秋二十有二

晤程二魚門有贈

去年傾蓋阜陵吳

敏軒丈

道汝聲名似顧厨意氣直凌滄海

淡鬚眉如對列仙圖高文久已傾枚馬紬史方將嗣董狐  
君才有事重修宋史擬向淮南探祕冊小山一半肯分無  
君書室顏

華陽客舍偶題

閉戶三日恒苦饑出門百里無所之懷中一刺久已滅腹  
內萬卷空自指天生良楮各有用牖下胡爲老吟弄楊子  
空期後世知梁生無復他鄉重俯仰身世徒營營美酒且  
向生前傾天公此事或心許不比人間利與名

同人約遊棲霞出太平門道間作

佳遊有約那須邀聯袂相於過板橋煙泛楊林山漠漠湖  
開萍葉馬蕭蕭何年戍向樵村設有數碑看獵火燒安得  
銅駝爲主客斜陽多處話南朝

吳長沙桓王廟

在銅井村

冠劍翻然玉貌森當年一旅渡江潯手開千古南朝局氣  
懾三江策士心公在豈容曹賊並天亡其奈鬼謀侵執鞭  
願上初明表元氣茫茫未可尋

清風鄉道左有梁吳平忠侯蕭景墓闕魚門賦詩四  
章卽和其韻

茂苑橫塘總劫灰江南付與子山哀空餘一石騏驎在曾  
見風臺月榭來

通才深識舊知聞特贈鴻名紀世勳不是清風留片石更

無人識故將軍

碑稱梁故侍中中撫將軍開府儀同三司吳平忠侯蕭公之神道梁書作中撫軍南

史僅稱開府儀同三司並誤

署書名氏訪來無蕭子雲耶紀少瑜象教西來行未盛何

人先解學佉盧

闕正書左行  
仄刻故云

路轉黃城十里村雙碑穹與二王鄰重泉此日應相過冷

話開皇劫後春

始興安成二王墓並在  
黃成村與侯神道鄰近

### 曉至攝山示方丈釋嵩亭

竹輿輕利曉堪憑凝望中峯勝景仍雙展獨沿青草徑十  
年重晤紫衣僧坐酬往事三生石行借修廊七尺簾漫以  
小詩勤索和霜毫留寫最高層

### 由中峯左赴幽居值雨小憩仍歸方丈

風聲疏密竹雲影高下松聞有開士宅置在松竹叢僧雛  
宛相導一徑趨蒙龍中有白煙出適與遊客逢葛巾半已

墊俯入山堂空軒窗意疏達涼氣何蓬蓬冰絲挂瓔珞水  
樂鳴丁東須臾眾籟寂殿角來清風迴頭盼棲所澹照留  
一峯青鞋出幽磳沙軟菖蒲茸流泉聲淅淅響答方竹筇  
品外泉在方丈後汲飲成句

幽泉如眞僧品在方以外自慚塵中人知津偶然逮時方

新雨餘潌澗納諸派亭亭蓮自開汨汨雲不壞

泉一名白雲刻石爲

蓮花狀水滴懸從菡中出小師習水觀汲取釣筒快浸以連枝茶香色

正初焙一甌高自持岸幘據石背竹風涼修修松月碧靄

靄

乘月過中峯晤月江上人遂宿白雲庵

山月晚招人冷挂松際屋徘徊光欲低復會月師宿單扉

開南榮小像綴橫幅圓蒲結跏趺靜對石燈綠東風意何  
爲吹雨斷而續蕭蕭復蕭蕭一夜在深竹

白雲庵曉起周墀綠萼初開偶憶宋侍郎張瓌讀書

於此

見宋王  
安國記

曉起先春禽抱影坐簷際疏鐘度寒窻忽與暗香至添衣  
下階除滿院但空翠娟娟色映春的的香入袂定展苔痕  
深目翫心與逝緬昔張唐公讀書此高寄平生山水懷獲  
茲良已慰公寄題徑山懷賢簡侍郎詩平生愛山水  
弗憚命駕之未能寄高躅聊用慰所思芳躅  
等飛煙餘風在條肄修到知幾生攀花獨長喟

春雨橋晚坐

在幽居  
門外

涼雨春添秀和煙濤翠微引聲低梵唱圓影晃僧扉浴鷺

清相照漂花澹不歸石闌如可惜小坐竟斜暉

舍利塔高七級在中峯之麓隋仁壽元年六月建

三十所浮圖施功此最初法幢先日到畫樣各州如呵衛

疑環坐神光信獨虛佳銘應首勒片石慨無餘

仁壽元年六月分送

佛舍利於各州建塔凡三十處余家藏有同州興國寺青州勝福寺兩銘當時他州例應視此惜無從訪拓也

由西峯後至天開巖

夾礪疑無路何年繡碧苔春隨沙影動晴數杏花開小立  
生衣卷徐行短杖偃雲間誰導我抗手一僧來

天開巖眺矚次韻

神境真疑造化私獨開一罅與天闔爲貪勝境攬身易欲

誦靈文上口遲

巖際有明楊時喬摹禹碑

觸鳥驚鴻聲習習胷衣生樹

黑離離景光肅穆青霄近可許高吟謝朓詩

佛殿階前銀杏

雙樹森森迴莫隣根蟠大地降青旻煙雲結處常供佛風  
雨來時合有神初地想經無始劫南朝應見棄家人八千  
歲月休嫌久畢竟深山有別春

千佛巖和薇庵集韻

秦景西行探佛乘合殿金人夢初應圖形始出中天臺化  
石何時四人境小身踵自竟陵王巨軀勑迺臨沂令一千  
劫首毘婆尸廿七師終達磨聖梵王帝釋兩廟挨居士宰  
官對修證石髓融來碧有餘巖膚剝就青無牘萬樹遙青  
豎法幢一泉淨綠揩新鏡山盡圓容水盡聲悟者齊咨迷

者敬齋心我來初地初禪指僧誇淨域淨瘦蹟曾經識九

言

山半千佛巖栖霞山字宋游九言書

靑鞋重與開三徑寫照誰爲許道靈

書經卻憶張文定白業他生久欲專俗緣此世嘆難竟且  
覓堂頭飯後茶漫題石罅名兼姓但愧身孱再拜難數聲  
孤負僧雛磬

與嵩亭開士觀九株松復過白雲庵別

九老晨招過翠嶢支離閱盡幾昏朝蒼髯爾許知何用留  
與高僧話六朝

一筇山北又山南竹塢松亭未是貪三宿尙餘桑下戀白  
雲重過讀書庵

日日清風坐講堂山賓何異共相伴尙餘望蜀心難慙未

拓真珉到上方

寺有明徵君碑唐高宗撰高正臣書

相送團瓢曉日初松門揖別漫踟躕此身縱使浮雲似有

日還來宿太虛

亭名在最高峯

拜張白雲先生墓

徵士千秋有故垌異時還宿少微星南冠被縶憐江革初

服還家重管寧海島魚龍空舊恨墓門被蔽至今青士衡

別有談經願欲叩遺書向杳冥

望溪侍郎云公著經說不下百餘卷曾以二甕藏置

隨以入壙

寶華山慧居寺

優鉢花間寶地憑盤空曾道跨鍾陵虛堂高視三千界寶  
相同持五百僧霜積蕭晨金殿朗雨消昨夜玉淵澄九蓮

聞說慈光在更欲攀躋最上層

寺有明慈聖太后像

### 晚宿衡陽山刹

遊倦歸心劇程途馬力疲山寒支閣瘦僧老應門遲夕殿

燈初上虛窗月正窺石幢留影在手撫半然疑

金陵頂事衡陽寺有

南唐石幢

### 寺僧以木瓜見贈歸置齋中偶作

好是宣州種先春慰杖藜清芬隨手落黃色與眉齊瓦枕  
頻推近蘆簾特放低倦來忻對坐佛手記相攜

### 遶園池上夜起納涼

夏暑秋未退入夜仍不支展轉弗能寐披衣過前墀清池  
喜在側方檻聊因依水流聽泚泚似有風吹衣此時天宇

寂月墜星亦稀牆陰百蟲絕但見蝙蝠飛遠趁迴廊燈一  
盞明玻璃悄與得新句澹泊如王韋耳目旣已適精神亦  
來歸因知清涼境未絕炎熇時向來貪夢寐失此良不訾

青溪和吳荀叔二首

新製雙遊艇將來繫短橋探花憶前路其奈不通潮浮雲  
歸北林新月生南浦照見隔溪人沙頭咲相語

鍾山書院桂樹下獨坐成韻

蒼蒼桂之樹煙月相參差涼雲燈自耿輕風簾半垂幽人  
澹無語獨坐方牀歆落落送歸意悄悄涼秋思惜此偃蹇  
質日爲塵堞羈遂使青玉骨瘦削不可支我來欲招隱惓  
惓無其辭但祝西風來莫向枝間吹

歸求草堂詩集卷二

江寧 嚴長明 用晦

癸酉

入春四日合族尊生堂作

春來天宇佳明媚無纖塵  
荒園梅乍開小閣鐙初陳  
歡言集少長裘帶緩以溫  
中亭各序列拜跽先我親  
親復命我拜諸父兼眾昆  
禮畢坐以次一主眾則賓  
殷勤酌椒酒估酒盤有鱗  
當杯無雜語但祝新年新  
五風十日雨右粥而左殮  
熙熙復嬉嬉共作堯時民

人日東楚筠蘅川

人日逢春又一迴匆匆時  
序苦相催閒門過雨雙啼  
鳥小

院籠煙一樹梅徑裏乍看苔草合春來頻夢筆花開草堂  
故事須重讀莫惜衝寒過酒杯

袁簡齋先生招集隨園看燈賦詩紀事

林泉煙月本家賞幾度春風到接羅未抵今宵高會好試  
燈剛直上元時

池邊新漲碧鄰池上分栽萬樹春明月照花燈照水爲  
紅添色綠添神

火珠明抵月輪圓更爆春星響暮煙山鳥翩翾魚撥刺風  
光驕絕晚晴天

橫空霜氣夜遲徊小部新翻十棒纔散步始知歌吹暖園  
花齊作二分開

畫簾垂處隱笙歌  
仿佛疑從月殿過  
忽地霓裳成隊出  
青天妬殺寡嫦娥

五色空教眼眩花  
歸來街鼓已三撾  
茅茨一點燈如豆  
剔向山妻取次誇

春晚東武玉溪

欲晴不晴春又分  
東風庭院晚初醺  
寒梅破鼻涼如水  
新月沾衣薄似雲  
正思酬朗夜  
當杯其奈惜離羣  
空餘池上清吟好  
一遣西堂夢裏聞

春日花下獨酌成詠

春雲如夢春風醒  
似水閒庭日初永  
小窗睡起自憑闌  
無數花枝弄清影  
花枝三月人二旬  
韶光半度春十分  
此時

對酒不成醉紫燕黃鸝空笑人勸君看花莫嫌獨勸君當  
杯莫辭數等閒杜宇一聲來極目天涯但新綠

遊絲和韻二首

非霧非煙著手勻漫騰騰地颺清旻無心掩我飛蓬鬢得  
意縈他倦繡人懶逐楊枝尋舊夢偶粘松網認前身丁寧  
好繫韶光住莫遣斜陽又送春

小院重簾恣意遊無因繫取問來由似愁雨著先縈樹強  
被風扶又上樓廿載有懷多似此三春垂盡更何求遙知  
其作沾泥絮才思空憐百丈優

與涂長卿訪月江上人憇香林寺作

爲訪支公過半山倏逢蕭寺得洞沿松陰滿地都成雨花

氣浮空欲化煙午梵止飄香闕外昏鐘忽到石廊前茶瓜  
好領閒僧意待得重遊已判年

青溪小姑祠迎送神樂章

并序

青溪小姑事載異苑及齊梁間樂府語多牒襲攷小姑實  
偕蔣侯罵賊以死者也祠在青溪第九曲未知建置所始  
然楊炯少姨廟碑云蔣侯三妹青溪之軌迹可尋則其來  
固已久矣屋數楹久廢不葺癸酉春有徐氏子病三日起  
告家人曰我小姑神也與兄嘉祐王同司民事久居覆舟  
山陽來日月出時當入祠可遣神巫具車乘來導我里人  
不之信是日夜大風折紅板橋柱及溪西楊柳七株居民  
大怖祝於蔣侯廟先葺祠屋以舉其事卜兆得吉至日余

偕同人往觀其祀以初更時列燈十二枝於坐前遣女巫  
二人盛飾攜蘆管且行且吹度白下橋西深林前去一食  
時乃歸道神且至一巫在墀下婆娑以舞作胡旋狀兩巫  
坐堂上按神絃而歌聲橙橙然幽呦斷續若難爲懷歌闋  
里人以次進酒醴肴蔬畢各隨其意爲祈禱禱畢復奠爵  
歌送神之曲而散余索其詞觀之大率攢撫鄉俗俚語而  
合以小曲爲節因憶古樂府載有小姑娘風吹落葉之辭古  
意深思與屈原九歌相表裏似此恐瀆神聽歸後因依其  
聲作迎送神樂章各五解惜賤事薄遽未及選妍巫以習  
之

溪水兮青青西去兮揚舲沿隄兮宛轉有丹扉兮畫扇扉

邊桃李兮時落英

一解

落英兮繽紛煙汎汎兮如塵風吹

蕙葉兮翻羅裙朝何以遊兮暮何以旋鳥空啼兮處處花

自落兮年年

二解

年年兮處處沂東流兮更南浦往既多

風兮來又多雨乘青雲而騁望兮見新蟾之乍吐想眉嫵

於天邊兮聊倪衣而延伫

三解

延伫兮未思吹笙詩兮若

有詞曷輯而楹兮曷款而扉疏以甲煎兮帶以辛夷妍娥

無舛兮夕侍其金釭十二兮摻手攜待靈之來兮良夜遲

四解

夜遲遲兮思焉泊勞蹇修兮進紛若被羅裳兮襲朱

襦日含光兮射林薄見遙林兮光灼灼中有小車飄以泊

前有緇桃兮後有紅藥

五解

右迎神樂章

綠牋兮三通風滿堂兮有容聲綵繚兮嬰空碎鏘珮兮鈴  
叢被青鞋兮豐以茸下曳修裳兮薄紅一解片香兮三柱

折殘梅兮翩翩以舞墀雪未消兮青苔滑履雙蛾側促兮  
不勝楚紅袂乍揄兮青裙再舉霎然而修兮若將以語二解

解三漿兮六醴雜肴烝兮孔嘉神弗歆兮左顧若凝矚兮

清歌歌三疊兮燭影斜神醉止兮朱顏酡巫再拜兮咲且  
譁爲姑整髻兮簪以花三解花綴兮花飛紛競進兮神毋

我違願今茲兮桑葉肥桔槔挂壁兮山泉滿畦青霜未降

兮先授衣夫婿遠遊兮歸無失期生女無賴兮男不疵四解

解重日迎神兮溪滸宛帝子兮降北渚送神兮溪邊想洛

妃兮去清川紙爭飛兮白煙潮半咽兮紅絃紅絃絕白煙

滅維靈之祀兮無敢或絕

五解

### 右送神樂章

偶詣西山道院和壁間韻

院在治城明洪武初長春真人劉淵然所居

生平質苦頑於道弗爲近里有全真居十載未乘輿今晨  
天宇佳步屨隨所竟彈指開雙扉寓目通一徑蕭蕭翠竹  
竿濯濯修荷柄側有侍香人姿格冰雪淨引我好樓居歛  
衽得閒凭輕風多遙吹斜日足餘映因知小有天卽在四  
塵境何因謝煩囂永此事幽屏看山不下樓心骨日清瑩  
何事更希仙終朝禮笙磬

### 過涂長卿蔭梧書屋

休夏君家好荆扉間枳籬苔花連小徑桐葉覆清墀看畫

過鄰叟哦詩聽客兒覓閒閒未得又早夕陽時

遊園池上有懷顧荃林

宿雨池上晴遙天意將暮華月生前溪流雲在高樹水態  
延清真煙姿泛容與露草黯復光風雲散還聚顧景懷伊  
人蹇裳欲同趣一帶阻佳期雙萍閒良晤回首蓮葉東阻  
長思欲赴蘋末有西風蕭蕭未能去

秦淮河上二首

芳草渡旁水綠夕陽橋外山橫舟子最能解事將船搖向  
簾旌

江上桃根早渡堂前燕子誰箋雙笛高樓忽起又將梁月  
吹圓

幽栖山祖堂寺

丹梯紺宇互鈎連道引欣逢釋皎然雙樹聳於無量佛一

幢安似永徽年

高僧傳永徽三年融師縱其天辯講揚大品地忽大動聽侶驚怖

閭瞻滿

月論宗乘

寺有南宗歷代祖師像

自擷新花佐佛筵笑向僧徒作檀

越留詩思抵刹竿懸

題法融禪師像並示藥根方丈

出家本是丈夫事

徑山欽禪師語

何肯浪隨人作計咄哉韋融真

我師大法橫出抽一枝雙峯信公特多務望氣暫來牛首

路獻花激水徒爾爲詎識安心卽常住頓機一觸如針鋒

掃卻落葉還秋容

傳燈錄僧問老宿牛頭既見四祖時如何曰落葉紛紛

蒼山嶺

象天闕自踞高坐稱南宗開堂斷自貞觀載杰構歸然至

今在中間龍象豈無人一一帖服稱兒孫

藥根上人以山中產茶見餉詩以奉答

天闕霜華夙未聞一囊親贈荷殷勤沁心香似芙蓉雨入

手輕於佛窟雲丹竈暗傳聲習習息泉秋聽碧沄沄

禪室有丹

竈投以薪火風自內生爨熟即止息泉在山後獻花岩

漫憂消耗清無寐剩欲談詩

坐夜分

送侯起叔之南昌

我如逢氏子少得迷罔疾終日書牢愁禿盡千兔筆祇言  
熒惑墮地化作兒童謠誰知奎壁畔天亦向風塵邀星精  
爲誰大梁子光芒萬丈隨驅使手底橫飛碧月光眼中那  
許微雲滓自命屈宋儔一朝忽悞讀遠遊謂今胸次苦塵

俗相思一浣西江流我昔遊仙夢匡嶺千里洪都會一宿  
雨絕空消南浦青雲歸無復西山綠懷哉陳太傅逝矣張  
司空惟剩匡山一片石向人不語開屏風送君去飲君酒  
君到彼都那能久我今手折楊柳枝爲君插向青溪口來  
年三月花定飄待汝東下乘春潮我當示汝一首索居賦  
君亦爲我朗誦廬山謠

甲戌

甯樸山讀書嘉興寺過訪有作

就傳逾十年篤志理訓故未獲昔聖心蚤被世名誤人師  
不我期將伯庶予助卓犖觀書鄙章句抗跡居此  
山商歌隱元霧高舉試追尋遐哉未遲暮

聖賢去千載傳者惟詩書落落語不多致用良有餘弱侯  
我先正曾此開精廬經術有原本太息不一舒用世古猶  
今願各礪無愚毋爲

原缺

過樊軫亭式古堂觀所藏鐘鼎彝器暨秦漢以來金  
石文字因賦長句以贈

夙抱尊古癖遠寄虞夏商坐惜生也晚捫索惟漢唐側聞

樊宗師恢博天所償書囊富猗頓辯囿雄蘇張宮商喜叶

應趨造顛衣裳充庭大椿直繞屋青溪長

軫亭居有古椿  
明程端伯侍郎

青溪書屋  
故址也

空堂擲科斗破壁蒙丹黃吉金肖子父華玉銘

姬姜四神卓鑑背六國排瓦當叢編及寶刻鋪敘盈巾箱  
秦權獲渭北漢闕摩嵩陽銅爵鄴宮毀石馬昭陵荒絕幽

竭修綆鬻貴羞空囊爭入大庭庫奮啟造物房飢腸充百  
怪陳指輶七襄稽經證羣史補缺參豪芒晨興逮日稷目  
眩神仿佯多君性情古益我鬚眉蒼因懷古先哲備物希  
無忘稽古首伊祈典室維宗湯分職武所職好古孔是皇  
母曰法與象精義中韜藏一一探其原灰燼皆文章橫渠張子語  
末流趨簡易薦溺老與莊下者迺束書畫地爲關防斷  
爛二三策急就五七行醯雞守寶天叛換成夜郎詎知螢  
爝外尙有七曜光聞君涉獻歲明經貢

天闔峨冠入太學敬爲諸生倡疇圖出河汾車服觀廟堂  
宵雅行復肄入耳聽洋洋

古詩三章呈謝山先生

千仞絕大壑百尺臨迴溪霜雪激澹淡鬱此龍門枝宮商  
一以具准量還相資襄夔不能薦卓立徒爾爲  
昭華入清渭自分沈幽宮水氣倏相藉陟作青天虹采之  
薦新廟秩祀襄璜琮詎曰梧臺姿端冕難爲容  
威鳳來中宮一母將九雛軒皇召天老再拜開靈圖道旁  
有黃雀挾起搶枋榆飛飛野田裏亦復思離朱

將往江陰次淳化關道中

秋雨槐花裏隨人出故關離懷滋暮節別路渺蒼山古道  
誰相語浮生豈易間茲來雖興盡敢作郟中還

晚宿慈應禪寺

日落山氣來蒼蒼散平野騁望迷煙村迴頭見蘭若深林

堪停車側徑可縶馬因隨梵唄聲緩步入精舍年深檀施  
衰殿廢鐘亦啞礪葉霜冷冷石瀨風灑灑雙鳥噪檐間一  
僧飯廊下肅我坐圓蒲就此佛燈炷秋空百慮微夜靜萬  
緣假勞筋何計舒曉柝復聞打

曉次金壇

重城朝未啟小泊向孤村白月啣官渡蒼煙閉水門稍聞  
津鼓動漸覺寺鐘昏無限茫茫意天涯孰與論

登江陰郭外樓居歸示同舍

學仙愛居樓看佛宜臥閣耐此官齋留閉置若處橐聞有  
陶隱居遠寄七里閣重屋延三層盤空利如削倚青旋梯  
危跨碧橫棧弱江風寒颭颭海日白照灼盪胸來青雲矯

翼逝黃鶴偶與真意并頓覺世情薄且欣霞上情頗愜邱  
中諾惆悵復歸來非君更誰說

西齋晚雨有懷故園

檐溜無心滴偏增旅客情短檠昏細漏高枕笑浮生暗想  
歸船阻涼知旅髻輕小園空翠裏應濕舊移橙

題曹來殷所藏趙文敏天山射獵圖

有足不跨追風駒有手不挽射日弧誰何猘此跨壯圖置  
我身到狼居胥狼居胥出天山塗俗綠水草安厥居下者  
當戶長骨都率以弓矢爲耰耨秋交八月沙草枯因山作  
櫓河作陸前茅後勁烝其徒黃雲隴畔爭傳呼在師中想  
爲單于後有從者蒼虬鬚東頭西頭隊各殊左射右射矢

不拘長繚野鷹重環盧封狼生羆羆生羆闕如虢虎攸鹿  
虞來逢交叉去入罟風毛雨血相模糊幻成雪海紅濤瀛  
四邊伐鼓鼓隴胡中軍頓轡趨穹廬地衣紅作流霞鋪琵琶  
小伎清而姝長裾半褰貂襜褕金鐙細點封駝酥挽鬚  
醉倒愁難扶樂哉此樂真丈夫王孫點筆工描摹鷗波池  
館當明湖陸梁狀此何爲乎人生有志誠難渝北人射獵  
南詩書嗟君與我皆東吳山有蘼薇園有蔬隰有鳬雁水  
有魚有經可畋史可漁網羅放逸蒐藏儲稱心弋獲佳有  
餘圖中之原將何需他年縱復如相如上林左右隨三驅  
再賦狸首歌騶虞用效子墨誇子虛

二忠祠詩

并序

二忠祠者祀江陰典史閻應元陳明遇也應元通州人崇禎十六年海賊顧三麻入黃田港力禦之以功遷英德主簿道梗未及赴明年南都亡列城皆下浙人陳明遇與應元嬰江陰城固守凡八十日

大兵入城眾猶巷戰應元赴水死明遇閭室自焚後之人哀其忠並愍其愚祀於邑之祥符寺寺卽

大兵破城所從入處也侍講劉印于以徵詩啟來爲賦一律

紫蓋黃旗一夕傾孤城何據復鳴爭吠堯自昧韓盧識望蜀空憐杜宇情百口已看成鬼厲亂山猶似蓄陰兵千秋雙廟憐張許風雨精靈想合并

西園列岫亭九日作

窗中遠岫列縈洞曲磴纖塵竹掃開高會未容隨戲馬病  
軀猶喜健登臺青山似恨雲俱出碧漢何時雁獨來一段  
秋懷無處寄黃花空插帽簷回

黃葉和半庵

黃子陂頭雨乍晴離離遙見遠林橫當關似掩微塵色近  
寺能傳落照情荒徑最宜孤衲掃江村曾記一舟行歸來  
欲借涪翁筆金井闌邊爲寫生

題穆大展攝山玩松圖

手栽松偃億經年閒話家山思惘然忽忽披圖如夢裏天  
風吹墮怒濤前

飄然身世一枯籐愛向蒼雲羃處登誰似山翁此標格瘦  
如飢鶴冷如僧

居士明僧紹不孤清蒼離立想眉鬚元規塵與劉輿賦此  
際能教著得無

憶別蒼顏廿載經

余於乙丑別君

爲憐雙鬢各星星題詩好寄長

饒老漫道山寒少茯苓

### 除夕寄家人

離家安忍便忘家況置時艱累更加白髮青尊虛竹葉紅  
燈良夜感椒花貧無弱息將誰共寒到今宵似有灑待取  
春來吟思健好酬釵鏡慰秦嘉

歸求草堂詩集卷三

江寧 嚴長明 用晦

甲戌

上巳偕友人北郭展眺

漢宮播芳序洛浦貽嘉辰矧值佳雨霽曠望蘭苕春懽言  
嘯儔侶巾駕逾層閬輕衫定林側小艇橫塘濱希心聽綿  
羽游目睇素鱗近郭已駘宕遙原倍清真鍾峯翠明滅曲  
水光鮮新旣欣支竺好復共山主親座間有王孟亭  
太守藥根上人弄翰  
籍密蔭飛璣臨青蘋俯仰極遊騁浩蕩隨蒼旻何須效蘭  
上感慨悲前塵

題沈學子五十小像

大雅何寥廓東陽舊有名老如袁伯業鄉似鄭康成名預

儒林傳交深白社盟惠施聞健在杖屨喜同并

時與惠定字徵士同

寓廬雅雨  
轉運署中

何限平生事沈淪著述科壯心銷蠹簡生計到漁簑舊德

青雲少

君昔受知潘敏惠王樓山兩中丞最深

新愁白髮多幾時看合并三

泖一來過

高興浮雲在幽懷白雪知醉吟豪士賦狂寫碧山詞真諾

探靈籍名經叩導師仰思江左逸幾輩許追隨

四海嗟爲客經年慶得朋圍棋春館靜載酒暮江澄命世

看仍爽名山或可憑師儒當代重待取鶴書徵

東皋

佳雨歇芳甸一溪新鳥鳴微微初日上面面曉煙橫因共  
流泉轉忽逢春草生土膏猶未動何處叱牛聲

表春閣坐雨

霧雨不成點偏能透薄帷清吟時放牖小睡欲添衣窗迴  
愁難倚簾虛翠不歸酒懷蕭瑟甚何祇惜花飛

秋日清涼精舍

簪茲雲門秋清曉赴修樾依叢得空山林端坐超忽深松  
散野陰青筠秀高節近矚逾清真遐瞻復歸流何處  
帆漸向蒼煙歇

金壽門以畫梅橫幅見寄漫賦三絕

妙手拈來色是空一叢珍重寄東風清厓長者逃禪去七

百餘年見此翁

玉鴉叉挂屋西偏紙帳移來相對眠夢醒忽驚窗影白不知是雪是蒼煙

印泥師法惜空勞鼠尾蜂鬚也自豪聞道畫梅如相馬人

間誰是九方臯

宋姜特立詩畫梅如相馬以骨不以形

法喜庵夜坐口占

心出家真似老龐長宵短榻結跏雙觀空那得離聲色風在虛檐月在窗

遊祖堂歸小憩寶光寺

近郭倏逢雨停輿樹一林桂花秋殿冷竹葉晚廊陰緩步流泉出凝心梵韻沈曇師今化去誰與住山心

丹徒港道間作

秋水一宵平秋光兩岸清  
城遙溪路細天濶雁行輕  
楚樹連雲碧吳江繞郭明  
三山看不遠惆悵若平生

京口和鄂虛亭大司馬韻

蒼茫天塹阨神州襄漢淮徐總上游  
地狹其愁般粟米時平人久忘孫劉  
新裁巨鎮誰橫海舊有官軍尙習流  
安得兵厨三百斛與公同酌大江秋

丹陽新河舟中

無復豪情酒畔生石家橋外一舟橫  
芙蓉岸岸開無主似對寒流憶曼卿

登君山懷古

轅駒鎮日苦羈愁爲訪遺踪陟廢邱身世茫茫何日竟江  
山落落古人休業從二十年方立亡自三千客與謀留得  
青山同夢澤誰吟楚些弔中洲

乙亥

由丹徒口渡江

巴蜀消春雪隨波萬里行際天雙岸失出霧一帆輕浩蕩  
羣鷗性伶俖獨雁聲畏風兼畏水愁絕倚窗情

盧雅雨觀察招遊平山堂酒間趙損之有作因次其  
韻

揚州煙月美無價只欠春山列如畫隔江恰有萬重青一  
一西飛落堂下茲來我亦過江人放船喜值花洲新紅橋

冶春盡堪翫高林倍與雙臚親沙路雨收淨如拭斜上松  
岡翠成滴破臘泉霏似雪清腴春梅早如人白此堂曾閱  
歐公來一尊風月迎江開掀髯想見目千里有無山色相  
縈迴

平山堂占勝蜀岡江南諸山一  
目千里公與韓衛公手簡語

一飲千鍾揮萬字太

守當時固如是坡仙去復千年三過遺蹤更誰嗣行樂  
空教屬少年酒懷牢落對江天醉來吟盡當時曲楊柳春  
風石檻前

### 寶應湖上水亭

寒食少逢天氣佳小舟閒放釣人家風吹十畝白蘋水雨  
濕一枝紅杏花誰遣客中成寂寞偶因春去惜年華西鄰  
小隱何時卜慚愧虛隨不繫槎

漂母祠

陳宇遙同釣浦留誰遺楚珮向中州藏名識蚤同黃石相  
士才先出鄼侯一飯偶爲公子寄千金肯是少年酬茲來  
我亦饑驅者覓取祠門獨繫舟

雨中渡河

九曲川原足怪奇況逢屏翳助馮夷南來直恐江湖合北  
望空勞岳牧咨敢道澄清餘曩志驗將忠信正斯時輸他  
海客蕭間甚擊楫中流祇賦詩

謂徐念祖大令

晚次豐邑

社轉枌榆暗古城中宵觸處喚愁生月臨大澤寒無影水  
到彭門夜有聲一代河渠書未就他鄉景物略粗成詰朝

共發杼秋色知向銅山更幾程

和謝山先生送鄂大司馬伊犁

匈奴本意職堯封當戶無端復劇戎遠徙拂廬歸日下並  
驅蕃馬入雲中中朝元老推方叔萬里長城倚魏公玉帳  
深沈刁斗靜談兵抵掌與誰同

寶應舟中

汜光湖畔路彌望祇空川露下見收網月中聞采蓮吳帆  
連夕霧楚火隔溪煙旅泊愁難定秦郵何處邊

仙女廟

在秦州

仙女何時廟間來一款犀鳥聲風外定幡影月中微桂露  
飄香澤荷煙展畫衣珮環歸路遠誰與贈支機

如皋城外訪水繪園故址

輕舟破秋水打槳及初旭款乃寒城切漸轉西林曲緣溪  
桑柘陰拂水鷓鴣浴熙熙若家鄰浣衣傍斜瀆爲問辟疆  
園迴頭送以目指示斷煙中啼鴉散喬木

汪韓懷招同朱稼翁江賓谷陳授衣江皋昆季集蠶  
園分韻有作

心跡天涯舊合并更逢高會集檐楹清風半榻茶煙細疏  
雨迴廊竹氣清黃菊再逢詞客病綠尊深擬故人情預愁  
明發瓜洲驛別雁新聞第一聲

余方病疾將  
於次日歸里

送謝山先生被

召入都

文章事業無今古離別須臾何足數公今被

召往司空余亦蹇裳返衡宇相看黷若垂天雲一南一北  
溶溶分南者入岫已寥廓北者出次方氤氲氤氲出作人  
間雨好澤焦枯荅

明主祇均賦丈治行輜苟且功名復奚取吁嗟乎公也學  
古期伊萊十年臺閣空徘徊致身快覩自今日我欲作頌  
師徂徠

酬趙損之曹來殷相送元韻

寒雨連江遠浪分輕橈相送感殷勤天涯抱病同今日吳  
下才名有數君江介淒涼偕奉袂海天蕭瑟獨離羣遙知  
他日持尊酒愁結江東日暮雲

登舟後復至江陰作

歲月看前度江湖未定居秋風當暮節客路轉南徐放志  
思監牧忘機媿老漁澄江何日到相望抵吾廬

列岫亭晏坐有寄

碌碌逢秋盡亭林此暫過江空聞雁少木落見山多憶彼  
元栖者愁如遠道何綿綿思奉袂無那洞庭波

題宋懋庭觀察網師小築十二韻

北山草堂

小築依山陟看雲日幾回無勞賡采杞卽此是南陔

濯纓水閣

鏡檻明于鏡低含極浦光本無塵可濯隨意詠滄浪